

# JAN BESSAT

*Au murmur di pin tremoulet,  
Longo-mai ié vegués la caro  
De Charloun un pau risoulet  
Dins l'oustaloun de nosto garo.*

CHARLOUN RIEU.

Au Paradou, lou 15 d'Abriéu 1913.

## AVERTIMEN

I'a déjà douge an que Charloun Rieu es mort! Despièi, n'en a parti bèn d'autre que l'an couneigu e, coume iéu, viscu de proche!...

Eiçò me remembro aquéu bèu tèms ounte l'endevenènço de mi founcioun amenistrativo avié vougu, pèr moun bonur, me faire pèr uno bono pountanado, lou capo de garo d'aquel endré astra.

Ah! lis ouro de chalun passado emé lou pouèto dins *l'oustaloun*, coume lou noumavo, ounte mai que d'uno fes m'a faugu courre, lou siblet à la man, pèr ana arresta un trin... que m'esperavo! Se pèr la seguito deviéu me vèire gratifica de quàuqui bèu galoun de mai, pode vous afourti qu'es pas aqui que li gagnère.

Basto! la Pouèsio èro rèino; Charloun, un diéu; lou Paradou, un paradis; me devinave l'ome lou pus uros de la Terro. De mai, lou Destin devié, pu tard, m'aparenta em' uno famiho di mai ounourablo e amado de l'endré.

Es pèr tóuti aquéli resoun coume lou bonur d'èstre esta lou fihòu e l'ami de Charloun, la grando amista reçaupudo di bràvi paradounen e, subre-tout, l'amour de mi parènt d'aqui; es dins aquéu dous e counfourtant souveni que cante vuei, emé tout moun cor, aquéu païs d'elèi dins lou biais de l'un de sis enfant li mai illustre e venera: *Charloun, lou brave Charloun dóu Paradou.*

**JAN BESSAT.**

Arle, lou 10 de janvié 1936.